

第七一五冊

經濟彙編

禮儀典

弔哭部

忌日部

祀典總部

(卷)

一三一

一三

一三

古今圖書集成

中華書局影印

第十一卷

卷十一

卷十一

卷十一

古今圖書集成

中華書局影印

欽定古今圖書集成經濟彙編禮儀典

第一百三十二卷目錄

弔哭部彙考一

周總一則

漢高祖一則

後漢總一則 明帝永平一則 廢帝延平一則

魏明帝太和一則

晉武帝咸寧一則 太康一則

宋武帝永初一則

南齊總一則 海陵王延興一則

梁總一則 武帝天監一則

陳高祖永定二則

北魏孝文帝太和二則

北齊總一則

北周總一則

隋高祖開皇二則

唐總一則 高祖武德一則 元宗開元一則

後唐明宗天成一則

禮儀典第一百三十二卷

弔哭部彙考一

周

周制弔臨諸臣及主人受弔儀

按周禮天官宰夫凡邦之弔事掌其戒令

鄭康成曰弔事弔諸侯諸臣也

大府凡邦國之貢以待弔用

鄭康成曰此九貢之財所給給弔用給凶禮之五事

世婦掌弔臨于卿大夫之喪

鄭康成曰王使往弔 賈氏曰案司服公卿大夫皆王親弔之此又使世婦者蓋使世婦致禮物但弔是大名雖致禮亦名爲弔是以大僕云掌三公六卿之弔勞注云致禮同名爲弔是其事也 王氏曰世婦視大夫故使弔臨于卿大夫之喪

女御從世婦而弔于卿大夫之喪

鄭康成曰從之數蓋如使者之介云 賈氏曰世婦象大夫女御象元士但介數依命數爲差則王

之大夫四命世婦之從亦四人

春官大宗伯朝覲會同則爲上相王哭諸侯亦如之

鄭康成曰哭諸侯者爲薨于國爲位而哭之檀弓曰天子哭諸侯也爵升經紼衣 胡康侯曰周制

王哭諸侯則大宗伯爲上相司服爲王制總麻宰

夫爲掌邦之弔事戒令與其幣器財用是王者所以懷諸侯

邇人凡王弔臨共介邇

鄭康成曰以尊適卑曰臨春秋傳曰照臨敝邑

鄭鏞曰禮記所謂臨諸侯嗟于鬼神曰有天王某是也王或親弔諸臣之喪或適四方舍于諸侯祖

廟之時雖曰至尊于人之祖先神明有所不敢忽使介執鬯以禮之邇人共介邇王亦未嘗親摯所謂天子無摯也

司服凡弔事弁經服

鄭康成曰論語曰羔裘元冠不以弔弁經者如爵弁而素加環紼

內宗王后有事則從大喪序哭者哭諸侯亦如之

賈氏曰此諸侯來朝薨於王國王爲之總喪者若檀弓云以爵弁純衣哭諸侯謂薨於本國王遙哭之則婦人不哭婦人無外事

凡卿大夫之喪掌其弔臨

鄭康成曰王后弔臨諸侯而已是以言掌卿大夫

云 王氏曰世婦言掌弔臨於卿大夫之喪則王

或使焉乃往內宗言凡卿大夫之喪掌其弔臨則

凡喪皆往亦同族故也

喪祝王弔則與巫前

鄭司農曰喪祝與巫以桃茢執戈在王前檀弓曰

君臨臣喪以巫祝桃茢執戈惡之也所以異於生

也春秋傳曰楚人使公親禭公使巫以桃茢先祓

殯楚人弗禁既而悔之君臨臣喪之禮故悔之

男巫王弔則與祝前

鄭康成曰巫祝前王也 賈氏曰喪祝云王弔則

與巫前二官俱在王前也 李嘉會曰王弔祝可

往也巫何與焉祝則以辭巫則用桃茢以除害也

女巫若王后弔則與祝前

鄭康成曰女巫與祝前后如王禮 賈氏曰與天

官女祝前后也

典路凡會同軍旅弔于四方以路從

易氏曰爲因會同賓客而行弔事

夏官大司馬王弔勞士庶子則相

鄭康成曰師敗王親弔士庶子之死若勞其傷者

則相王之禮庶子卿大夫之子從軍者或謂之庶

士 鄭鏞曰士庶子宿衛王官者也王親征則從

王在軍而屬司馬有死者王親弔之司馬相其弔

勞之禮以其在軍故也

司士凡士之有守者令哭無去守

鄭康成曰守官不可空也 易氏曰不以喪而廢其職

大僕掌三公孤卿之弔勞

鄭康成曰王使往 鄭錡曰王於公卿有弔之之禮以致其哀戚之情有勞之之禮以示其憫勞之意三公孤卿近臣之重故遣僕臣以往見其恩厚也

小臣掌士大夫之弔勞凡大事佐大僕

鄭錡曰掌小事故掌弔勞于士大夫凡有大事則為大僕之佐而已

御僕掌羣吏之逆及庶民之復與其弔勞

李嘉會曰羣吏庶民安有弔勞觀陽門之介夫死而子產哭之哀漢征民宿衛及其去也天子親享之羣吏庶民或有弔勞宜也

按儀禮士喪禮君使人弔徹帷主人迎于寢門外見賓不哭先入門右北面

注使人士也禮使人必以其爵徹帷屏之事畢則下之

弔者入升自西階東面主人進中庭弔者致命

注主人不升賤也致命曰君聞子之喪使某如何不淑

主人哭拜稽顙成踊實出主人拜送于外門外

注稽顙頭觸地成踊三者三

高祖二年為義帝發喪哀臨三日

按漢書高祖本紀二年冬十月項羽使九江王布殺義帝于郴漢王為義帝發喪袒而大哭哀臨三日

後漢

後漢有弔臨遣使之制光祿大夫大鴻臚分掌之

按後漢書禮儀志朝臣中二千石將軍使者弔祭郡國二千石六百石以至黃綬皆賜常車驛牛贈祭宜

自佐史以上達大斂皆以朝服君臨弔若遣使者主人免經去杖望馬首如禮免經去杖不敢以威凶服當尊者

前書賈山上書曰古之賢君子臣也尊其爵祿而親之疾則臨視之無數死則往弔哭之臨其小斂

大斂已棺塗而後為之服錫衰經而三臨其喪未斂而不飲酒食肉未葬不舉樂可謂盡禮矣服法

服端容貌正顏色然後見之故臣下莫敢不竭力盡死以報其上功德立於世而令問不忘也

按百官志凡大夫議郎皆掌顧問應對無常事唯詔命所使凡諸國嗣之喪則光祿大夫掌弔大鴻臚王

薨則使弔之

明帝永平元年東海王彊薨帝為發哀

按後漢書明帝本紀永平元年東海王彊薨遣司馬馮魴持節視喪事 按東海恭王彊傳永平元年彊

臨命上疏天子覽書悲愴出幸津門亭發哀

殯帝延平元年十二月甲子清河王薨使司空持節弔祭

按後漢書殯帝本紀不載 按安帝本紀云云

明帝太和五年曹真薨帝幸城東哭之

按魏志明帝本紀太和五年三月大司馬曹真薨

按杜佑通典魏大司馬曹真薨王肅為舉哀表云在

禮大臣之喪天子臨弔諸侯之薨又庭哭焉同姓之

臣崇於異姓自秦逮漢多闕不行光武頗遵其禮時

羣臣莫不競勸博士范升上疏稱揚以為美可依舊

禮為位而哭敦睦宗族於是帝幸城東張帷哭之

晉

武帝咸寧二年詔定為王公大臣發哀之制

按晉書武帝本紀不載 按禮志咸寧二年十一月

詔諸王公大臣薨應三朝發哀者踰月不舉樂其一

朝發哀者三日不舉樂

太康二年賈充薨有司議弔臨儀

按晉書武帝本紀太康二年夏四月庚午太尉魯公

賈充薨

按後漢書禮儀志注晉起居注曰太尉賈充薨皇太

子妃之父又太保也有司奏依漢元明二帝親臨師

保故事皇太子素服為發哀又臨其喪

宋

武帝永初二年零陵王薨車駕三朝率百僚舉哀于

朝堂一依魏明帝服山陽公故事

按宋書武帝本紀云云

南齊

南齊制漆畫輪車御為郡公舉哀臨哭所乘又白紵單衣謂之素服以舉哀臨喪

按南齊書輿服志云云

海陵王延興元年王薨議百官臨會儀

按南齊書海陵王本紀不載 按禮志海陵王薨百

官會哀時纂嚴朝議疑戎服臨會祠部郎何佟之議羔裘元冠不以弔理不容以兵服臨喪宋泰始二年孝武大祥之日于時百僚入臨皆于宮門變戎服著衣恰入臨畢出外還襲戎衣從之

梁

梁制小輿形似輅車金裝漆畫但施八橫元正大會乘出上殿西堂舉哀亦乘之行則從後一名輿車又單衣白恰以代古之疑衰皮弁為弔服為羣臣舉哀臨喪則服之

按梁書不載 按隋書禮儀志云云

武帝天監五年皇太子為貴嬪母喪舉哀別第

按梁書武帝本紀不載 按隋書禮儀志天監五年

貴嬪母車喪議者疑其儀明山賓以為貴嬪既居母

憂皇太子出貴嬪別第一舉哀以申聖情庶不乖禮

帝從之

陳

高祖末定二年江陰王範詔遣太宰弔祭司空監護

喪事

按陳書高祖本紀云云

未定三年六月辛丑故司空周文育之柩至自建昌

壬寅高祖素服哭于東堂

按陳書高祖本紀云云

北魏

孝文帝太和十五年帝為高麗王璉舉哀于城東行

宮

按魏書孝文帝本紀云云 按禮志太和十五年高

麗王死十二月詔曰高麗王璉守蕃東隅累朝貢獻

年踰期頤勸德彌著今既不幸其赴使垂至將為之舉哀而古者同姓哭廟異姓隨其方皆有服制今既久廢不可卒為之哀且欲素委貌白布深衣于城東為盡一哀以見其使也朕雖不常識此人甚悼惜之有司可申敕備辦事如別儀

太和十九年為太師馮熙舉哀于行在

按魏書孝文帝本紀太和十九年春三月戊子太師

馮熙薨夏四月庚子車駕幸彭城癸丑帝為太師馮

熙舉哀于行在所

北齊

後齊河清中改易舊物著令定制乘輿東西堂舉哀

服白恰皇太子為宮臣舉哀白恰單衣烏皮履未加

元服則素服

按北齊書不載 按隋書禮儀志云云

北周

後周帝后及諸侯已下弔服各有其制

按北周書不載 按隋書禮儀志後周設司服之官

掌皇帝十二服其弔服錫衰以哭三公總衰以哭諸

侯疑衰以哭大夫皆素弁環絰又其弔服諸侯於其

卿大夫錫衰同姓總衰於士疑衰其當事則弁絰否

則皮弁公孤卿大夫之弔服錫衰弁絰皮弁亦如士

之弔服疑衰素裳當事弁絰否則徒弁又皇后之弔

服為妃嬪三公之夫人孤卿內子之喪錫衰為諸侯

夫人之喪總衰為媛御婉及大夫孺人士之婦人之

喪疑衰皆吉弁無首諸侯之夫人及三妃與三公之

夫人已下凶事則五衰其弔諸侯夫人於卿之內子

大夫孺人錫衰於已之同姓之臣總衰於士之婦人

疑衰皆吉弁無首其三妃已下及媛三公夫人已下及孺人其弔服錫衰御婉及士之婦人弔服疑衰疑衰同弁

隋

高祖開皇 年定臨弔諸臣服制

按隋書高祖本紀不載 按禮儀志高祖初即位將

改周制下詔集通儒詳議定令採用東齊之法乘輿

白恰白紗單衣烏皮履舉哀則服之臨臣之喪三品

已上服錫衰五等諸侯總衰四品已下疑衰皇太子

白恰單衣烏皮履為宮臣舉哀則服之臨弔三師三

少則錫衰宮臣四品已上總衰五品已下疑衰

開皇二年使使弔於陳

按隋書高祖本紀開皇二年春正月庚申陳宣帝殂

夏六月甲申使使弔於陳

唐

唐制禮部郎中員外郎及鴻臚寺卿掌弔事

按唐書百官志禮部郎中員外郎凡出蕃冊授弔贈

者給衣冠皇親三等以上喪舉哀有司帳具給食又

鴻臚寺卿皇帝皇太子為五服親及大臣發哀臨弔

則卿贊相

高祖武德四年始著臨弔輿服之制

按唐書高祖本紀不載 按車服志武德四年始著

車輿衣服之令天子之車曰四望車者拜陵臨弔所

乘也制如安車青油繡朱裏通德朱絲絡網皇后之

車六四望車者拜陵弔喪所乘也青油繡朱裏通德

皇太子之車三四望車者臨弔所乘也金飾末紫油

繡朱裏通德天子之服十四白恰者臨喪之服也白

紗單衣烏皮履

元宗開元二十年開元禮成定舉哀臨弔之制

按唐書元宗本紀不載 按舊唐書禮儀志蕭嵩為集賢院學士奏起居舍人王仲丘撰成一百五十卷名曰大唐開元禮二十年九月頒所司行用焉

按開元禮皇帝為外祖母舉哀本司散下其禮所司隨職供辦尚舍奉御先於別殿設素褥牀薦為舉哀成服位南向尚衣奉御先製小功五月之服守宮先於舉哀殿外門之外隨便設百官文武次如常其日舉哀前三刻諸衛屯門列仗如常諸應陪慰者並赴集次所典儀於舉哀殿門之外布百官位亦如常又於殿前設諸王三品已上哭位文東武西重行北面相對為首諸親位於文武官五品之下皇宗親在東異姓親在西又於階下當御位北向設太尉奉慰位文武百官到入次改服素服侍中版奏請中嚴亦在三刻之前尚衣奉御以篋奉衰服升立於殿東間北面典謁引諸王百官一品以下九品以上俱就門外位文武侍衛之官詣閣奉迎舉哀前一刻侍中版奏外辦皇帝服素服御輿出升別殿降輿即哭位南向坐侍衛如常至時侍中跪奏請為故某官若某郡君舉哀俛伏與皇帝哭十五舉聲侍中跪奏請哭止成服俛伏與皇帝止尚衣奉御以篋奉衰服進跪授與仍贊變服焉於變服則權設步障已而去之成服已待中又跪奏請哭俛伏與皇帝哭通事舍人引諸王文武百官三品已上入就殿庭位舍人贊拜羣官在位者皆再拜舍人贊哭羣官在位皆哭十五舉聲舍人贊止羣官在位皆止舍人引諸王為首者一人

進詣奉慰位跪奉慰俛伏與舍人引退還本位又舍人大次引百官文武行首一人進詣奉慰位跪奉慰俛伏與舍人引退還本位舍人贊拜在位者皆再拜舍人引三品已上退出其四品以下位於門外者典謁贊拜贊哭贊止引退如殿庭之儀侍中跪奏請哭止俛伏與皇帝止御輿降還侍衛從至閣如初所司宣仗散其日哺哭則哺前二刻奏嚴一刻奏辦皇帝服衰服出即位次哭如初百官不集自後朝哺三日而止 為皇后父母舉哀與為外祖父母禮同其異者製總麻三月之服朝哺再哭而止 為諸王妃主舉哀本司散下其禮所司隨職供辦尚舍奉御先於肅章門外道東設大大南向周以行帷御座設素褥牀席守宮隨便於未安門外設文武官五品以上便次其日舉哀前三刻侍中版奏請中嚴前二刻諸衛列仗如常典儀於大次前量遠近設一品以下應陪集者哭位文東武西重行北面相對為首百官皆集大改服素服就位又於大次前設奉慰位前一刻文武侍衛之官詣閣奉迎如常侍中版奏外辦皇帝素服御輿複道以出從閣官後門入之大次降輿即哭位南向坐侍衛如常至時侍中跪奏請為故臣某官若主若妃舉哀俛伏與皇帝哭通事舍人贊羣官拜羣官在位者皆再拜若百官為門外位者候入大次通事舍人引三品已上入次前位四品以下仍門外位舍人贊哭羣臣在位者皆哭十五舉聲舍人贊止羣臣在位者皆止舍人引文武官行首皆一人詣奉慰位跪奉慰俛伏與引退還本位舍人贊拜羣臣在位者皆再拜訖有門外位者典謁贊拜贊哭贊止侍中跪

奏請哭止俛伏與又奏請還宮退本位立皇帝哭止御輿降還其侍衛從至閣如常所司宣仗散其日哺哭則哺前二刻奏嚴一刻奏辦皇帝仍初服出位次哭如初侍衛如初百官不集自後本服周者凡三朝哭而止本服大功者其日哺哭而止本服小功以下一舉哀而止若皇太子陪舉哀則素服左應子啓引從帷宮南門入至大次前啓再拜訖引升東間之南北面哭於百官哭止進御座前跪俛伏與再拜於百官退引降拜還如初其官官等應陪拜慰者則隨班於上臺自下皆然 為內命婦宗戚舉哀與為諸王妃主禮同三品夫人以上其日仍哺哭而止其九嬪以下一舉哀而止亦隨恩賜之深淺 為貴臣舉哀與為諸王禮同其異者一舉哀而止貴臣謂職事二品以上散官一品其餘官則隨恩賜之深淺 為蕃國主舉哀與為貴臣禮同其異者城外張帷幔為次向其國而哭之至舉聲而止 皇帝臨諸王妃主喪本司散下其禮所司隨職供辦尚舍直長先設行宮大次於主人第大門外之西南向守宮於主人大門外隨便設諸從駕文武之官便次其所臨者五屬之親於乘輿未到之前並先集列於主人之第其執事先於其寢北設帳幔為主人五屬婦女拜哭次其日未出宮前四刻侍中版奏請中嚴出宮前三刻搥一鼓為一嚴所司整設小駕鹵簿於所出宮門外如常儀出宮前二刻搥二鼓為再嚴奉禮於所出宮門外設陪從官位如常尚舍奉御先於主人第大門外便殿之內設皇帝便座南向又於主人堂上中間設素下牀席為哭位亦南向典儀又於主人庭中設陪從

官位文東武西重行北面相對爲首又於御座前階下設奉慰位主人執事於堂下設五屬之親位於東階之東重行西面北上又設五屬婦女位於堂北幔下主女位於東廂西面南上妻妾位於西廂東面南上衆婦人位於北廂重行南面諸親在東相對爲首以服精麤爲序而尊者差前其五屬外內並臨於此所諸陪從之官各常服赴集其位有司整列皇帝四望車以下及仗衛之屬應列鹵簿者於內外如常儀出宮前一刻又搥三鼓爲三嚴侍衛之官詣閣奉迎如常侍中版奏外辦皇帝服常服御輿以出繖扇華蓋侍衛警蹕如常儀皇帝降輿升車黃門侍郎進當車前跪奏稱黃門侍郎臣某言請乘輿發退復位駕動警蹕如常黃門侍郎與贊者夾輅以出至侍臣上馬所黃門侍郎進跪奏稱請駕權停敕侍臣上馬倂伏與侍中前承詔退稱制曰可黃門侍郎退唱侍臣上馬贊者承傳文武侍臣上馬畢黃門侍郎奏稱請乘輿發退復位變駕動稱警蹕鼓吹不作文武羣官應陪從者乘馬以從駕至行宮門外侍中進跪奏請降車倂伏與退復位皇帝降車御輿就大次其輿輦以下鈸戟仗衛之屬陳列於大次之前左右皇帝變服素服其陪從之官各舍於便次變服素服其侍臣及武官不變服主人相者引主人內外五屬之親各服縗服就堂下外內位次哭典儀一人立於堂下東階東南贊者二人立於其南退俱西面皇帝變服訖御輿出侍御如常主人免經去杖司儀令引出大門外望見乘輿止哭再拜迎仍引主人先入門右西面立不哭其未殯即通拜迎拜送於大門內皇帝至堂

侍中跪奏請降輿升倂伏與於所臨喪者非尊秩則御輿升堂皇帝降輿升自東階即哭位巫祝各一人先升巫執桃立於東南祝執蒺藜立於西南相向千牛四人執戈隨升二人先二人後侍臣夾升列於戶內外及階下左右其仗衛鹵簿列於門外內如常司儀令引主人入中庭北面典儀稱拜主人內外皆再拜勅引主人升司儀令引主人升主於戶內之東西面侍中跪奏請哭倂伏與皇帝哭典儀稱哭贊者承傳唱可哭凡典儀有詞贊者皆承傳主人以下在位者皆哭典儀引諸從官應陪臨者入即班位立定典儀稱拜從官在位者皆再拜典儀稱哭從官在位者皆哭十五畢聲典儀稱止從官在位者皆止典儀引諸王爲首者一人進舍人接引詣奉慰位跪奉慰倂伏與舍人引退典儀接引還本位又典儀次引諸從官文武行首一人進舍人接引詣奉慰位跪奉慰倂伏與舍人引退典儀引從官在位者出又典儀次引諸王等以次出侍中跪奏請哭止倂伏與皇帝止典儀稱哭止主人以下皆止司儀令引主人降立于庭中之東北面典儀稱拜主人以下皆再拜侍中跪奏請哭止倂伏與皇帝降御輿出侍衛警蹕如初司儀令引主人先出俟於大門外拜送皇帝至大次降輿即御座變服司儀令引主人哭還廬大皇帝停大次未發前三刻侍中版奏請中嚴所司先奏三嚴搥鼓整列仗衛鹵簿于還途如來儀奉禮于行宮南門外道左向道重行設陪從之官位文左武右陪從之官于便次變服常服赴集位所典儀引即班位三嚴已侍中版奏外辦皇帝御輿出侍衛警蹕並如初皇帝降

輿升車黃門侍郎奏請及羣官陪從鼓吹不作並如來儀乘輿至殿前若閣外迴車侍中跪奏請降入倂伏與皇帝降車御輿入侍臣從至閣如初侍中版奏解嚴將士各還其所百官皆退臨外祖父母喪皇后父母宗戚貴臣並與臨諸王妃主禮同其臨王妃喪及凡內喪則並幸其前寢次也其尊應就喪殯寢者則臨殯寢所凡臨諸王妃主尊親者及師保傳與三老五更二王後喪則敬同外祖其所臨幸者若第鄰官闕率爾往還則容不備鹵簿與嚴鼓皆稟當特別儀注其內外文武陪從官准駕備略車駕若經太廟則侍中跪奏式過乃復常敕使弔諸王妃主喪本司散下其禮所司隨職供辦守宮先於主人第大門外之右設使者次南向其日使者至掌次者引之次內外衰服司儀引主人以下俱立哭於東階下婦人立哭於殯所如常儀使者素服出次司儀引立於大門外西東面持節者立於使者之北少退史二人對舉弔書案立於使者之南差退俱東面城外不持節司儀入告主人去杖免經司儀引主人出門止哭迎於大門外見賓先入立於門右北面司儀引使者入持節者先導持案者次之內外止哭使者入門而左立於階間南面節在使者之東少南西向持案者立於使者西南東面司儀引主人進當使者前北面持節者脫節衣史以案進詣使者前使者取弔書持案者退復位使者稱有制弔主人哭拜稽顙內外皆哭司儀引主人進受弔書退立于東階下西面哭持節者加節衣司儀引使者持節者先導持案者次之出復門外位主人以弔書授左

右司儀引主人出內門止哭拜送於大門外使者還主人杖哭而入取弔書於階下升奠於柩東使人若須私弔則通名引入弔如常禮訖引出若朝使致聘賓至主人迎受如弔書儀唯贈物掌事者受以東藏之 敕使弔外祖父母喪后父母宗戚貴臣蕃國主並與弔諸王妃主喪同 制遣百僚會王公以下喪守宮先於主人第大門外隨便量設百官文武應會弔者便次其日司儀令先於主人第前殿庭北面而行設百官位以西爲上百官應會弔者並赴集主人第門外便次各服素服司儀以次引入就班位立定司儀贊可哭諸官在位者皆哭十五舉聲司儀贊可止諸官在位者皆止司儀引諸官行首一人升詣主人前席位展慰非應致敬者則立慰訖引降出又司儀引諸在位者以次立不致敬者出應致敬者再拜引退 敕使榮贈諸王守宮於主人大門外之西設使者及使副次南向其使人及副公服從朝堂受冊載於轎車使人及副各備鹵簿鼓樂備而不作至主人大門外降車掌次引之次內外衰服司儀引主人以下就東階下位婦人升就堂上位皆立哭使者出次謁者絳公服引立於門西東面使副立於使者之南持節者立於使者之北少退史二人對舉冊案立於使副西南俱東面司儀入告主人去杖免經司儀引主人出門止哭迎使者於大門外見賓先入立於門右北面謁者引使者入持節者先導使副及持冊案者次之內外止哭使者升立於柩東北廂南面持節者在使者之東少南向西向使副立於持節南持冊案者立於使副東南俱西面司儀引主人升立干階

上當使者北面持節者脫節衣使以冊案進使副前使副取冊案退復位使副以冊進使者受稱有制主人降於階間北面哭拜稽顙內外皆哭司儀引主人升復北面內外止哭使者謂冊訖主人降於階間北面哭拜稽顙內外皆哭司儀引主人升詣使者前受冊退跪奠於柩東與降立於東階下西面初使人受冊訖持節者加節衣謁者引使者持節者先導使副及持案者次之出復門外位司儀引主人出內門止哭拜送於大門外使者還主人經杖哭而入其使者應私弔則通名引入弔如常禮引 敕使榮贈外祖父母后父母貴臣蕃國王並與冊贈諸王禮同若主人六品以下則拜及受制皆於堂下 敕使致奠諸王妃主喪守宮於主人大門外量設便次使者至掌次者引之次內外衰服司儀引主人以下俱就東階下位婦人就堂上位皆立哭使者公服出次謁者絳公服引立於門西東面執事者陳牢饌於使者東南當門北向西上司儀入告主人去杖司儀引主人出內門止哭迎於大門外見賓先入立於門右北面謁者引使者入內外止哭使者升自東階立於柩東少北南面執事者以牢饌入升設於柩東西向南上司儀引主人升自西階立於階上當使者北面執事者酌酒西面奠於席退復位使者曰某封若某位將歸幽宅制使某奠主人降詣階間北面哭拜稽顙內外皆哭謁者引使者及從者降出復門外位初主人拜稽顙訖司儀引主人退哭於東階使者出司儀引主人出內門止哭拜送於大門外使者還主人杖哭而入 敕使致奠外祖父母喪后父母貴臣蕃國

主喪奠並與諸王妃主禮同 皇后臨內命婦喪本司散下其禮所司隨職供辦降臨前二刻尚儀版奏請中殿尚寢先於命婦以下寢中間北廂設素下牀席爲后哭位南向小輿進於內庭降臨前一刻尚儀版奏外辦后服素服升輿出常侍從者侍衛如常式至內命婦以下喪寢降輿即位哭侍衛如常式於后之將至也女侍者啓引亡者所生皇子降東階之南西面再拜已成服則去杖又女侍者啓引亡者所生皇女出北戶降寢北南面再拜引並升復位哭如初尚儀跪奏請哭哭后哭從臨者皆哭十五舉聲尚儀跪奏請哭止撫慰皇子等后止女侍者引皇子就后前跪哭后撫慰皇子與再拜仍立哭又引皇女進撫慰如撫慰皇子之禮尚儀跪奏請還后升輿引降還侍衛如初於后之降也侍者啓引皇子降拜引升復位哭女侍者啓引皇女降拜引升復位哭並如初 后弔外祖父母喪本司散下其禮所司隨職備辦內給事二人爲使者守宮先於主人第大門外之左右設使者次南向其日使至掌次者延入次內外衰服司儀引主人以下俱立哭於東階下婦人立哭於殯所如常儀使者素服出次內典引引使者立大門外之西東面內給使二人以案奉令書立於使者之南差退俱東面司儀入告主人去杖免經司儀引出門止哭迎於大門外見賓先入立於門右北面內典引引使者以下入內外止哭使者入門而左立於階間南面持案者立於使者西南東面司儀引主人進當使者前北面內給使以案進詣使者前使者取弔書持案者退復位使者稱有令弔主人哭拜稽顙內外皆哭

司儀引主人進受弔書退立於東階下西面哭內典引使者以下出復門外位主人以弔書授左右司儀引主人出內門止哭拜送於大門外使者還主人杖哭而入取弔書於階下升奠於柩東若使者須私弔則通名引入弔如常禮訖引出 后弔諸王妃主喪弔宗戚喪皆與遣使弔外祖父母喪禮同凡葬及練祥使弔之禮並同 皇太子為諸王妃主舉哀本司散下其禮所司隨職供辦齋師先於宜秋門外道東設皇太子次南向周以行帷設素下牀褥席守宮於重明門外設宮臣七品以上便次其日舉哀前三刻左庶子版奏請中殿舉哀前二刻諸衛率列仗如常掌儀於次前設宮臣五品以上哭位文東武西重行北面相對為首又設一品以下七品以上於帷宮門外亦如之又於次前設奉慰位宮臣七品以上應陪慰者並起集便次改服素服前一刻通事舍人引一品以下俱就門外位文武侍衛之官並詣閣奉迎如常式左庶子版奏外辦皇太子服素服升腰輿出閣從帷宮後門入降輿就哭位即坐侍衛如常儀左庶子跪奏請為某王若某公某王太妃舉哀俛伏與皇太子哭通事舍人引宮臣五品以上入各就班位立定舍人贊拜宮臣在位者皆再拜舍人贊哭宮臣在位者皆哭十五舉聲舍人贊止宮臣在位者皆止舍人引宮臣行首一人進詣奉慰位跪奉慰俛伏與舍人引退還本位舍人贊拜宮臣在位者皆再拜舍人引宮臣等出其六品以下位於門外者典調贊拜贊哭贊止引退皆如門內之儀左庶子跪奏請哭止俛伏與還本位皇太子止升腰輿還侍衛從至閣俱

如常儀其日脯哭則脯前二刻奏嚴一刻奏辦皇太子仍初服出即位次哭如初其宮臣等非近侍者其日脯臨不集皇太子於師保傳奉慰再拜則左庶子奏與受答再拜乃坐哭自後本服周者三朝哭而止本服大功者其日脯哭而止本服小功以下一舉哀而止其有皇子皇孫應陪舉哀者皇子則位於皇太子之下皇孫則位於東間之南北面與皇太子俱哭於引宮官以下退已乃贊止引退其應拜慰者引進跪奉慰如常禮自下皆然為良娣舉哀則於內別殿三朝哭而止為良媛一舉哀而止師保傳與諸王同宗戚與妃主同官臣與諸王同並一舉哀而止宮臣通第三品以此其餘官隨恩深淺 為外祖父母舉哀本司散下其禮所司隨職供辦齋師先於東宮別殿北壁下設素下牀席為皇太子舉哀成服位南向有司先製皇太子小功五月之服其為妃父母則製緦麻三月之服所司先於重明門外之左右量設宮臣以下次其日舉哀前三刻又設一品以下九品以上哭位於舉哀殿門外亦如之又於階下當舉哀位北向設奉慰位宮臣應陪臨者並起集便次服素服齋師以篋奉衰服升立於殿東間北面立典調引一品以下九品以上俱就門外位文武侍衛之官詣閣奉迎舉哀前一刻左庶子版奏外辦至時皇太子服素服升輿出升別殿降即哭位坐侍衛如常左庶子跪奏請為故某官若某郡君舉哀俛伏與皇太子哭十五舉聲左庶子跪奏請哭止成服俛伏與皇太子止哭齋師以篋奉衰服進跪授輿仍贊變服焉成服左庶子跪奏請哭俛伏與至成服訖請哭止如諸王

妃主儀皇太子止哭升輿降還侍衛從至閣如常其日脯哭則脯前二刻奏嚴一刻奏辦皇太子服衰服出即位次哭如初宮官不集自後朝脯凡三日而止 臨諸王妃主喪本司散下其禮所司隨職供辦守宮先於重明門外之左設三師等次又於主人第大門外之右設皇太子便次南向又於大門之左右隨便設陪從之官次其所臨者五屬之親先集列於主人之第其執事先於寢北設障幔為主人五屬婦人拜哭次其日出官前四刻左庶子版奏請中殿出官前三刻搥一鼓為一嚴二衛率等備列常行仗衛鹵簿所出宮門外內如常儀出官前二刻又搥二鼓為再嚴奉禮於重明門外之左右設宮官從者位文東武西重行相向皆以北為上齋師先於主人大門外次內設皇太子座南向又於主人堂上中間近北設素下牀席為皇太子哭位南向掌儀於主人庭設從官之位文東武西重行北面相對為首又於皇太子座前階下設奉慰位主人執事於堂下設五屬之親位於東階之東重行西面北上以服精粗為序而尊者差前又設五屬婦女位於堂北幔下主女位於東廂西面北上妻妾位於西廂東面南上衆婦人位北廂南面諸婦在西諸親在東相對為首其五屬內外並陪臨於此所其陪從宮官以下皆常服赴集其位有司整列皇太子四望車及副車仗衛之屬應列鹵簿者於外內如常儀出官前一刻又搥三鼓為三嚴諸侍衛之官俱詣閣奉迎左庶子版奏外辦皇太子服常服升輿以出扇蓋及侍從如常儀皇太子降輿升車中允進跪奏稱中允臣某言請車發俛伏與退

復位凡中允奏請皆進跪奏稱某官臣某言訖俛伏與車動中允與贊者夾引以出至侍臣上馬所中允奏稱請車權停令侍臣上馬左庶子承令退稱令曰諾中允退稱侍臣上馬贊者承傳文武侍臣皆退上馬畢中允奏請車發退復位皇太子車動鼓吹不作三師乘車訓導二少乘車訓導從官臣文武應陪從者皆乘馬以從如常至主人大門次前左庶子進跪奏請降車俛伏與還侍位皇太子降車升輿入次其車輿以下鹵簿仗衛之屬列於次前之左右皇太子變服素服其陪從之官各就次變服素服侍臣及文武官不變服相者引主人內外五屬之親各服衰服就堂下位次哭掌儀一人立於堂下東階東南贊者二人立於其南差退俱西面皇太子變服訖升輿出侍衛左右如初主人免經去杖相者引出門外遙見輿止哭再拜迎仍引主人先入門左西面立不哭若未殯則通拜迎拜送於大門之內相者贊衆主人以下皆止哭皇太子至堂左庶子跪奏請降輿升輿俛伏與皇太子降輿升自東階即哭位應拜者則奉引拜靈次侍臣夾升列於戶內外及階下之左右其仗衛鹵簿止列於門內外之左右並如常儀司儀引主人進中庭北面掌儀稱拜主人以下應拜者皆再拜令引主人升司儀引主人升立於戶內之東西面左庶子臨奏請哭俛伏與皇太子哭掌儀稱贊者承傳唱可哭主人以下及在位者皆哭通事舍人引諸從官應陪位者入即班位立定掌儀稱拜從官在位者皆再拜掌儀稱哭從官在位者皆哭十五舉聲掌儀稱止從官在位者皆止通事舍人引從官行首一人進

詣奉慰位跪奉慰俛伏與引退還本位掌儀稱拜從官在位者皆再拜訖舍人引從官出左庶子跪奏請哭止撫慰主人俛伏與皇太子止與就主人前執手訖主人再拜皇太子復位哭又盡一哀凡所臨非五屬之親則一哭而止左庶子跪奏請哭止俛伏與皇太子止掌儀稱止主人以下在位者皆止司儀引主人降立於庭中之東北面掌儀稱拜主人以下在位者皆再拜左庶子奏請還皇太子降升輿出侍衛如初司儀引主人先出俟於大門外拜送皇太子至次降輿即座服常服司儀引主人哭還廬次皇太子降大次未發前三刻左庶子版奏請嚴有司依式先奏三嚴搥鼓如初二衛率等整列仗衛鹵簿還途如來儀奉禮設宮官陪從者位於皇太子次前道左文武皆重行向道陪從之官各於次變服訖謁者各引就班位三嚴已左庶子又奏外辦皇太子升輿出升車還宮左庶子奏請及宮官陪從不鳴鼓吹皆如來儀到重明門外宮官文武皆下馬三師三少皆還皇太子至殿前迴車南向左庶子跪奏請降車俛伏與皇太子降車升輿入侍臣從至閣左庶子奏請解嚴將士各還其所宮官皆退臨外祖父母喪妃父母師傳保宗戚官臣並與諸王妃主禮同其臨諸王妃主以下內喪則並位於前寢次其尊親應就喪殯寢者則臨殯可凡所臨諸王妃主以下喪若未殯若已殯或臨啓引或練禫皆以本服親疎及恩賜深淺而為疎數之異其親臨之儀及主人迎待之式其禮如初其所臨者若鄰宮闕率爾往還則容不備常行仗衛與嚴鼓皆稟當時則旨而為儀注其宮臣陪從文武

官亦准臨時備略皇太子每過太廟則左庶子奏式過乃復常遣使弔諸王妃主外祖父母妃之父母師傳保宗戚貴臣上臺貴臣並與計奏弔儀同皇太子妃臨良娣以下之喪本司散下其禮所司隨職供辦降臨前二刻司則版啓啓中嚴掌筵先于喪寢中間北廂設素下牀席為妃哭位南向腰輿進於內庭降臨前一刻司則版啓外辦妃服素服升輿出常侍從者侍衛如常至喪寢所降輿升喪寢即位坐哭侍從者侍衛如常於妃之將至也女侍者啓引亡者之子降東階之南西面再拜已成服則去杖又女侍者啓引亡者之女出北戶降寢北面再拜引並升復位哭如初司則跪啓請哭妃哭從臨者皆哭十五舉聲跪啓止撫慰妃止女侍者引亡者之子詣妃前跪哭撫慰之子與再拜引退復位又引亡者之女如上禮司則跪啓請還妃升輿引降還侍衛如初於妃之降也侍者啓引亡者之子降拜引升復位哭女侍者啓引亡者之女降拜引升復位哭並如初敕使弔使者公服入立於寢門外之西東面相者入告主人素冠降自西階迎於寢門之外見賓不哭先入立於門右北面內外皆止哭開帷使者入升立西階東面進主人於階下北面使者稱有敕主人再拜使者宣敕云某封位薨情以惻然如何不淑主人哭拜稽顙內外皆哭使者出主人拜送於大門之外親故為使弔者既出易服入向戶立哭十數聲止降出主人唯於敕使出升降自西階賓弔賓至掌次者引之次賓著素服相者入告內外衰服相者引主人以下立哭於阼階下婦人升哭於殯西相者引賓入立於庭

北面西上爲首者一人進當主人東面立云如何不
淑主人哭再拜稽顙爲首者復北面位弔者俱哭十
餘聲相者引出少頃相者引主人以下各還次 親
故哭若有親故哭殯者內外俱升就殯堂位尊者坐
若賓敵體以上賓初入則起賓坐亦坐賓起亦起內
外俱哭相者引賓入升堂立於殯東西向南上尊者
坐俱哭盡哀尊者起相者引出卑者再拜訖乃就主
人前稍南東北面執爵相者引以次出恩深者賓拜
訖主哭盡哀或就孝子撫哭盡哀而出少頃相者引
主人以下降還次 州縣官長弔若刺史哭其所部
主人設席於柩東西向刺史素服將到相者引主人
去杖立於門內之左北面刺史入升自東階即座西
向坐哭主人升就位哭刺史哭盡哀將起主人降復
階下位刺史降出主人拜送於大門外杖哭而入
刺史遣使弔若刺史遣使弔使者至堂次者引就次
內外俱衰服主人以下就階下位婦人入就堂上位
內外俱哭使者素服執書相者引入門而左立于階
間東面使者致辭主人拜稽顙相者引主人進詣使
者前西面受書退復位左右進受書主人拜送於位
相者引使者出使者若自人弔哭如上弔儀客出少
頃內外止哭各就位 親故遣使致賻使者立於大
門外之西東面從者以篋奉元纁束帛立於使者西
南俱東面相者入告主人立哭相者進主人前東面
受命出詣使者前西面曰敢請事使之從者以篋進
詣使者前西向以授使者退復位使者曰某封若某
官無官封者卽稱某子使某賻相者入告出曰孤某
須矣相者引使者入立於內門外之西東面主人止

哭使者少進東面曰某封若某官使某賻主人哭再
拜使者少進坐委之與復位掌事者進坐舉之與以
東相者引使者出主人拜送若使者致物不以器掌
事者訝受之不委於地其餘賻物從者執之立於使
者東南北面西上掌事者受之以東藏之 親賓致
奠啓之日親賓致奠於主人設啓奠後諸尊者入立
於寢門之外東向祭具陳於尊者東南北向西上相
者入告內外卑者皆興立哭於位又相者引尊者入
升當柩東西面尊者哭祭具從升於柩東尊者之西
西向南上設饌訖執饌者降出奠者止哭詣酒罇所
取爵酌酒跪奠於柩東與少退西面立內外皆止哭
奠者曰某封若某位伯叔將歸幽宅謹奉奠若異姓
各從其稱若使者云某封若某姓聞某封若某官將
歸幽宅使某奉辭奠畢應拜者再拜內外皆哭主人
哭拜稽顙奠者哭盡哀止相者引執事者以次徹饌
而去

後唐

明宗天成元年冬十月辛丑契丹使沒骨饒來告阿
保機哀廢朝三日

按五代史唐本紀云云

欽定古今圖書集成經濟彙編禮儀典

第一百三十三卷目錄

弔哭部彙考二

遼 總一則 太宗 天顯一則 會同一則 聖宗 統和
遼 宗應曆四則 景宗 保寧一則 聖宗 統和
二則

宋 太祖建隆一則 太宗太平興國一則 真
宗咸平一則 仁宗天聖一則 明道一則 理
宗嘉祐一則 高宗紹興一則 理
宗寶慶一則

金 熙宗皇統一則 衛紹王至寧一則
明 太祖洪武二則

弔哭部彙考三

禮記 曲禮 檀弓 曾子問 文王世子 玉
器記 禮 喪服小記 少儀 雜記 喪大記
奔喪

荀子 大略

太平御覽 賀循喪服要記 講茲喪服圖 皇

禮儀典第一百三十三卷

弔哭部彙考二

遼

遼制弔臨輿服之制

按遼史儀衛志漢輿四望車一名明遠車拜陵臨弔
則用之金飾青油纁朱裏通轆駕牛餘同安車皇太
子四望車弔臨用之金飾紫油纁通轆駕一馬

太宗天顯八年唐主嗣源殂九年唐遣使告哀即日
遣弟弔祭

按遼史太宗本紀云云

會同五年晉來告哀遣使往弔

按遼史太宗本紀會同五年六月乙丑晉主敬瑭殂
戊辰晉遣使告哀輟朝七日庚午遣使往弔祭秋
七月庚寅晉遣金吾衛大將軍梁言判四方館事朱
崇節來謝丁未晉遣使以祖母哀來告八月癸酉遣
天成軍節度使蕭拜石弔祭於晉十二月癸亥晉遣
使來謝

穆宗應曆元年九月以世宗憂告哀於漢十一月漢

周南唐各遣使來弔

按遼史穆宗本紀天祿五年九月癸亥世宗遇害丁

卯即皇帝位改元應曆是月遣劉承訓告哀於漢冬

十一月漢周南唐各遣使來弔

應曆五年十一月乙未朔漢主崇祖子承鈞遣使來

告且求嗣立遣使弔祭遂封冊之

按遼史穆宗本紀云云

應曆十六年十月庚辰漢主有母喪遣使賻弔

按遼史穆宗本紀云云

應曆十八年秋七月辛丑漢主承鈞殂子繼元立來

告遣使弔祭

按遼史穆宗本紀云云

景宗保寧八年十一月丙子宋主匡胤其弟昞自

立遣使來告辛卯遣郎君王六捷馬涅木古等使宋

弔慰

按遼史景宗本紀云云 按禮志宋使告哀儀皇帝

素冠服臣僚皂袍輕帶宋使奉書右入丹墀內立西
上閤門使右階下殿受書上殿欄內鞠躬奏封全

開封於殿西案授宰相讀訖皇帝舉哀舍人引使者

右階上欄內俯跪附奏起居訖俛興立皇帝宣問南

朝皇帝聖躬萬福使者跪奏來時皇帝聖躬萬福起

退舍人引使者右階下殿於丹墀西面東鞠躬通事

舍人通使者各名祇候見再拜不出班奏聖躬萬福

再拜出班謝面天顏再拜又出班謝遠接問湯藥

再拜贊祇候引出就幕次宣賜衣物引從人入通各

拜奏聖躬萬福出就幕賜衣如使者之儀又引使者

入面殿鞠躬贊謝恩再贊有教賜宴再拜贊祇候出

就幕次宴引從人謝恩拜教賜宴皆如初宴畢歸館

聖宗統和十五年高麗遣韓彥敬奉幣幣越國公主

之喪

按遼史聖宗本紀云云

統和二十八年宋夏高麗遣使來弔皇太后之喪

按遼史聖宗本紀統和二十七年十二月皇太后崩

於行宮遣使報哀於宋夏高麗二十八年二月丙戌

宋遣王隨王儒等來弔祭己亥高麗遣魏守愚等來

弔祭 按禮志宋使祭奠弔慰儀太皇太后至敢塗

殿服喪服太后於北間南面垂簾坐皇帝於南間北

面坐宋使至幕次宣賜素服皂帶更衣訖引南北臣

僚入班立定可矮敦以下並上殿依位立先引祭奠

使副捧祭文南洞門入殿上下臣僚舉哀至丹墀立

定西上閤門使自南階下受祭文上殿啓封置於香

案哭止祭奠禮物列殿前引使副南階上殿至褥位

立揖再拜引太使近前上香退再拜太使近前跪捧

臺玦進奠酒三教坊奏樂退再拜揖中書一舍人跪

捧祭文引太使近前俯伏跪讀訖舉哀引使副下殿

立定哭止禮物擔牀出畢引使副近南面北立勾弔
慰使副南洞門入四使同見大行皇帝靈再拜引出
歸幕次皇太后別殿坐服喪服先引北南面臣僚並
于殿上下依位立弔慰使副捧書匣入當殿立閣
門使右下殿受書匣上殿奏封全開讀訖引使副南
階上殿傳達弔慰訖退下殿立引禮物擔牀過畢引
使副近南面立勾祭奠使副入四使同見鞠躬再
拜不出班奏聖躬萬福再拜出班謝面天顏又再拜
立定宣徵傳聖旨撫問就位謝再拜引出歸幕次皇
帝御南殿服喪服使副入見如見皇太后儀加謝遠
接撫問湯藥再拜次宣賜使副并從人祭奠使副別
賜讀祭文例物即日就館賜宴高麗夏國奉弔進聘
等使禮略如之道宗崩天祚皇帝問禮於耶律固宋
國遣使弔及致祭歸贈皇帝喪服御遊仙之北別殿
使入門皇帝哭使者詣柩前上香讀祭文訖又哭有
司讀遺詔慟哭使者出少頃復入陳贈賜於柩前皇
帝入臨哭退更衣御遊仙殿南之幄殿使者入見且
辭赦有司賜宴於館

宋

太祖建隆四年慕容延釗卒帝素服發哀

按宋史太祖本紀不載 按禮志舉哀掛服尚舍設
次於廣德殿或講武殿大明殿其後皆於後苑王地
前一日所司預設舉哀所幕殿周以簾帷包用青素
其日皇帝常服乘輿詣幕殿侍臣奏請降輿俟時釋
常服服素服白羅衫黑銀腰帶素紗軟脚幘頭太常
博士引太常卿當御座前跪奏請皇帝為其官薨舉
哀又請舉哀十五舉音又奏請可止中書門下文武

百官進名於崇政殿門外奉慰皇帝釋素服服常服
乘輿還內建隆四年山南東道節度使慕容延釗卒
太祖素服發哀

太宗太平興國七年實僭卒罷宴弔臨

按宋史太宗本紀太平興國七年冬十月左諫議大
夫參知政事實僭卒 按禮志太平興國七年十月
中書言今月七日乾明節選定二十二日大宴二十
日參知政事實僭卒明日皇帝親幸其第臨喪慟哭
設奠還宮即令罷宴有司奏伏以百司告備六樂在
庭睿聖至仁聞哀而罷是以顯君父愛慈之道廟臣
子忠孝之心伏請宣付史館傳錄美實詔可
真宗咸平二年楊礪卒即日弔臨

按宋史真宗本紀不載 按禮志車駕臨奠太常新
禮宰相樞密宣徽使參知政事樞密副使駙馬都尉
薨皆臨幸奠爵及發引乘輿或再往咸平二年工部
侍郎樞密副使楊礪卒即日冒雨臨其喪
景德元年李沆薨詔擇日舉哀

按宋史真宗本紀景德元年秋七月李沆薨 按禮

志李沆薨禮官言舉哀品秩雖載禮典伏緣國朝惟
趙普曹彬會行茲禮今望裁自聖恩詔特擇日舉哀
自後宰臣薨皆用此禮
大中祥符元年李繼和卒即日弔臨

按宋史真宗本紀不載 按禮志大中祥符元年殿

前都虞候端州防禦使李繼和卒真宗將臨其喪以
問宰臣對曰繼和以品秩實無此禮陛下敦序外族
先朝亦嘗臨杜審瓊之喪於禮無嫌帝然之即日辛
其第

大中祥符二年遼遣使告哀詔禮官定儀注以聞

按宋史真宗本紀大中祥符二年冬十二月甲辰契
丹國母蕭氏卒輟視朝 按禮志凡外國喪告哀使
者至有司擇日設次於內東門之北隅命官攝太常
卿及博士贊禮俟太常卿奏請即向其國而哭之五
舉音而止皇帝未釋素服使人使朝見不宜班不舞蹈
不謝面天顏引當殿喝拜兩拜奏聖躬萬福又喝拜
兩拜隨拜萬歲或增賜茶藥及傳宣撫問即出班致
詞訖歸位又喝拜兩拜隨拜萬歲喝祇候退大中祥
符二年十二月北朝皇太后凶訃遣使來告哀詔遣
官迓之廢朝七日擇日備禮舉哀成服禮官詳定儀
注以聞其日皇帝常服乘輿詣幕殿俟時釋常服服
素服白羅衫黑銀腰帶素紗軟脚幘頭太常卿跪奏請
皇帝為北朝皇太后凶訃至掛服又奏請五舉音文
武百僚進名奉慰退幕殿仍遣使祭奠弔慰
天禧元年季秋大享明堂王旦薨詔既祠後成服發
哀

按宋史真宗本紀天禧元年秋九月己酉王旦薨

按禮志天禧元年太尉王旦薨時季秋大享明堂其
日發哀真宗疑之禮官言祠事在質明之前成服于
既祠之後于禮無嫌詔可

仁宗天聖九年契丹使來告哀為發哀苑中並遣使
弔祭

按宋史仁宗本紀天聖九年秋七月契丹使來告其
主隆緒殂遣使祭奠弔慰 按禮志天聖八年六月
契丹使來告哀禮官詳定北朝凶訃宜於西上閣門
引來使奉書令閣門使一員跪受承進宰臣樞密使

已下待制已上並就都亭驛弔慰七月一日使者耶律乞石至帝與皇太后發哀苑中使者自驛赴左掖門入至左昇龍門下馬入北偏門階下行至右昇龍北偏門入朝堂西偏門至文德殿門上奉書太常博士二員與禮直官贊引入文德殿西偏門階下面北跪進書閣門使跪受承進太常博士禮直官退使者入西上閣門殿後偏門入宣祐西偏門行赴內東門柱廊中間過幕次祇候朝見訖赴崇政殿門幕次祇候朝見皇太后訖出三日近臣慰乞石於驛

明道元年趙德明卒輟朝舉哀

按宋史仁宗本紀明道元年冬十一月延州言夏王趙德明卒按禮志明道元年十一月二十四日敕夏王趙德明薨輟朝三日令司天監定舉哀掛服日辰其日乘輿至幕殿服素服太常博士引太常卿當御坐前跪奏請皇帝爲夏王趙德明薨舉哀又奏請十五舉音又奏請可止文武百僚進名奉慰告哀使副以下朝見首領并從人作兩班見先首領見兩拜後班首奏聖躬萬福又兩拜隨拜萬歲喝賜例物酒食跪受起又兩拜隨拜萬歲喝各祇候退從人儀同是日皇太后至幕殿釋常服白羅大袖白羅大帶舉哀如皇帝儀其遣使致祭弔慰如契丹

慶曆元年定臨羣臣喪儀制

按宋史仁宗本紀不載按禮志康定二年是年十一月改元右正言知制誥吳育奏臣竊見車駕每有臨奠臣僚宗戚之家皆即時出幸道路不戒刑衛不全從官奔馳衆目驚異萬乘法駕豈慎重之意乎雖震悼方切於皇慈而舉動貴合乎經禮臣竊詳通禮舊儀

蓋俟喪家成服然後臨奠於事不迫在禮亦宜臣愚欲乞今後車駕如有臨奠去處乞俟候本家既斂成服然後出幸則恩意容與詳而得中警蹕羽儀備之有素事下禮官議遣喪之家有出殯日乃成服者恐至時難行臨奠請自今聖駕臨奠臣僚宗戚之家若奏計在交未前即傳宣閣門只於當日令所屬候儀衛備奏請車駕出幸若奏計在交未後即次日臨奠庶使羽衛整肅於事爲宜詔可其儀乘輿自內出千牛將軍四人執戈一人執桃一人執前導車駕將至所幸之第贊禮者引喪主哭于大門內望見乘輿止哭再拜立于庭皇帝至幕殿改素服就臨喪主內外再拜皇帝哭十五舉音喪主內外皆哭皇帝詣祭所三奠酒喪主已下再拜皇帝退止哭從官進名奉慰皇帝改常服還內通禮著皇帝臨諸王妃主外祖父母皇帝父母宗戚貴臣等喪出官服常服至所臨處變服素服天聖喪葬令皇帝臨臣之喪一品服錫衰三品已上總衰四品已下疑衰皇太子臨弔三師三少則錫衰官臣四品已上總衰五品已下疑衰

慶曆五年定大臣喪輟朝之制

按宋史仁宗本紀不載按禮志輟朝之制禮院例冊文武官一品二品喪輟視朝二日于便殿舉哀掛服文武官三品喪輟視朝一日不哀掛服然其車駕臨問并特輟朝日數各係聖恩一品二品喪皆以翰林學士已下爲監護葬事以內侍都知已下爲同監護葬事葬日輟視朝一日皆取旨後行慶曆五年四月禮院奏準度支員外郎集賢校理知院會公亮奏朝廷行輟朝禮並乞以聞哀之明日輟朝其假日便

以充數仍爲求例如值其日前殿須坐則禮有重輕自可略輕而爲重更不行輟朝之禮臣今看詳公亮所奏誠於輟朝之間適宜順變然慮君臣恩禮之情有所未盡欲乞除人使見辭春秋二宴合當舉樂即於次日輟朝餘乞依公亮所奏詔可

嘉祐三年契丹使來告哀遣使祭弔

按宋史仁宗本紀嘉祐三年二月契丹使來告其祖母哀輟視朝七日遣使祭奠弔慰按禮志嘉祐三年正月契丹告國母哀使人到闕入見皇帝問云卿離北朝日姪皇帝悲苦之中聖躬萬福朝辭日即云皇帝傳語北朝姪皇帝嬪太皇太后上仙遠勞人使計告春寒善保聖躬中書樞密以下待制以上赴驛弔慰云竊審北朝太皇太后上仙伏惟悲苦五月獻遺雷物

高宗紹興二十五年秦檜薨車駕臨弔

按宋史高宗本紀紹興二十五年冬十月丙申夕秦檜薨十一月乙巳追封檜申王賜神道碑額爲決策元功精忠全德甲子幸秦檜第臨奠

理宗寶慶元年春正月濟王玠計聞特輟視朝

按宋史理宗本紀云云

金

熙宗皇統元年梁宋國王宗幹及紀王宗彊薨輟朝臨弔

按金史熙宗本紀皇統元年夏五月己酉太師領三省事梁宋國王宗幹薨庚戌上親臨日官奏戌亥不宜哭泣上曰君臣之義骨肉之親豈可避之遂哭之勅命輟朝七日六月壬辰有司請舉樂上以宗幹新

喪不允甲午紀王宗彊薨上親臨輓朝如宗幹喪

衛紹王至寧元年宣宗即位臨奠於衛紹王第

按金史衛紹王本紀不載 按宣宗本紀至寧元年

八月即皇帝位九月臨奠於衛紹王第有司奏舊禮

當設坐哭上命撤坐伏哭盡哀

明

太祖洪武二年鄂國公常遇春卒於軍命議舉哀親臨弔之

按續文獻通考洪武二年六月征虜左副將軍中書

平章軍國重事鄂國公常遇春卒於軍計聞上命禮

部議舉哀喪至龍江上親出祭之

洪武十八年魏國公徐達計開親臨哭之

按大政紀洪武十八年二月乙未魏國公徐達卒特

追封中山王諡武寧

按續文獻通考太祖開中山王計至披髮徒跣往哭

又親至龍江迎祭國初優禮大臣如此

弔哭部彙考三

禮記

曲禮

齊者不樂不弔

註陳呂氏曰樂則散哀則動皆有害於齊也不樂不

弔全其齊之志也

知生者弔死者傷知生而不知死弔而不傷知死

而不知生傷而不弔

註陳方氏曰不知生而弔之則其弔也近於詔不知

死而傷之則其傷也近於僞 應氏曰弔者禮之

恤乎外傷者情之痛於中

弔喪弗能賻不問其所費

註以貨財助喪事曰賻不能則不問者以徒問爲

可愧也

臨喪不笑望柩不歌入臨不翔

檀弓

死而不弔者三畏厭溺

註陳方氏曰戰陳無勇非孝也其有畏而死者乎君

子不立巖巖之下其有厭而死者乎孝子舟而不

游其有溺而死者乎三者皆非正命故先王制禮

在所不弔 應氏曰情之厚者豈容不弔但其辭

未易致耳若爲國而死於兵亦無不弔之理若齊

莊公之於杞梁之妻未常不弔也

夫子曰始死羔裘元冠者易之而已羔裘元冠夫子

不以弔

註疏曰養疾者朝服羔裘元冠即朝服也始死則

去朝服著深衣時有不易者又有小斂後羔裘弔

者記者因引孔子行禮之事言之

有殯聞遠兄弟之喪雖總必往非兄弟雖鄰不往

註陳三年之喪在殯不得出弔然於兄弟則恩義存

焉故雖總總兄弟之異居而遠者亦當往哭其喪

若非兄弟則雖近不往

所識其兄弟不同居者皆弔

註陳馮氏曰上二句既主生者出弔往哭爲義則下

一句文義當同所識當爲句若所知之謂也死者

既吾之所知識則其兄弟雖與死者不同居我皆

當弔之所以成往來之義也

天子之哭諸侯也爵弁絰紼衣

註陳爵弁紼衣本土之祭服爵弁弁之色如爵也紼

衣絲衣也 鄭氏曰經衍字也周禮王弔諸侯弁

經總衰 疏曰天子至尊不見尸柩不弔服此遙

哭之故不服總衰而服爵弁紼衣也

或曰使有司哭之

註陳鄭氏曰非也哀戚之事不可虛全廬陵胡氏曰

諸侯薨在國天子遙哭之不親見尸柩故不服總

衰弔而服士之祭服有司哭之非也

唯天子之喪有別姓而哭

註陳分別同姓異姓庶姓使各相從而爲位以哭也

士備入而後朝夕踊

註陳國君之喪諸臣有朝夕哭踊之禮雖依次居位

踊踊必相視爲節不容有先後也士卑其入恆後

士皆入則無不在者矣故舉士入爲畢而後踊焉

君於大夫將葬弔於宮及出命引之三步則止如是

者三君退朝亦如之哀次亦如之

註陳弔於宮於其殯宮也出柩已行也孝子攀號不

忍君命引之奪其情也引者三步即止君又命引

之如是者三柩車遂行君即退去君來時不必恆

在殯宮或當柩朝廟之時亦如之或已出大門至

平日待賓客次舍之處孝子哀而暫停柩車則亦

如之

大夫弔當事而至則辭焉弔於人是日不樂婦人不

陳大夫弔弔於士也大夫雖尊然當主人有小斂大斂或殯之事而至則殯者以其事告之辭猶告也若非當事之時則孝子下堂迎之婦人無外事故不越疆而弔是日不樂不飲酒食肉皆為餘哀未忘

弔於葬者必執引若從柩及曠皆執紼

陳引引柩車之索也紼引棺索也疏曰弔葬本為助執事故必相助引柩車凡執引用人貴賤有數數足則餘人皆散行從柩至下柩窆時則不限人數皆悉執紼也引者長遠之名故在車車行遠也紼是撥舉之義故在棺棺惟撥舉不長遠也喪公弔之必有拜者雖朋友州里舍人可也弔曰寡君承事主人曰臨

陳此謂國君弔其諸臣之喪弔後主人當親往拜謝喪家若無主後必使以次疏親往拜若又無疏親則死者之朋友及同州同里及喪家典舍之人往拜亦可也寡君承事言來承助喪事此君語攝者傳命以入之辭主人曰臨者謝辱臨之重也君遇柩於路必使人弔之

陳黃尚書宮受弔不如祀梁之妻知禮而此言弔於路何也蓋有爵者之喪當以禮弔此謂臣民之微賤者耳禮不下庶人也言必使人弔者是汎言衆人之喪也

大夫之喪庶子不受弔

陳大夫之喪適子為主拜賓或以他故不在則庶子不敢受弔不敢以卑賤為有爵者之喪主也妻之昆弟為父後者死哭之適室子為主祖免哭踊

夫入門右使人立於門外告來者狎則入哭父在哭於妻之室非為父後者哭諸異室

陳此聞妻兄弟之喪而未往弔時禮也父在己之父也為父後妻之父也門外之人以來弔者告若是交遊習狎之人則徑入哭之情義然也疏曰女子子適人者為昆弟之為父後者不降以其正

故也故姊妹之夫為之哭於適室之中庭子為主者甥服舅總故命己子為主受弔拜賓也祖免哭踊者冠尊不居肉祖之上必先去冠而加免故凡哭哀則踊踊必先袒袒必先免故袒免哭踊也夫入門右者謂此子之父即哭妻兄弟者

有殯聞遠兄弟之喪哭於側室無側室哭於門內之右同國則往哭之

陳側室燕寢之旁室也門內大門之內也上篇言有殯聞遠兄弟之喪雖總必往其亦謂同國歟方氏曰哭於側室欲其遠殯宮也於門內之右者不居主位示為之變也同國則往者以其不遠也反哭之弔也哀之至也反而亡焉失之矣於是為甚

陳賓之弔者升自西階曰如之何主人拜稽顙當此之時亡矣失矣不可復見吾親矣哀痛於是為甚也賓弔畢而出主人送於門外遂適殯宮即先時所殯正寢之堂也

殷既封而弔周反哭而弔孔子曰殷已慤吾從周

陳殷之禮寢畢實就墓所弔主人周禮則侯主人反哭而後弔孔子謂殷禮太質慤者蓋親之在土固為可哀不若求親於平生居止之所而不得其哀為尤甚也故弔於墓者不若弔於家者之情文

為兼盡故欲從周也

君臨臣喪以巫祝桃茢執戈惡之也所以異於生也喪有死之道焉先王之所難言也

陳桃性辟惡鬼神畏之茢莠帶也所以除穢巫執桃祝執茢小臣執戈蓋為其有凶邪之氣可惡故以此三物辟祓之也

曾子問

曾子問曰昏禮既納幣有吉日女之父母死則如之何孔子曰婿使人弔如壻之父母死則女之家亦使人弔父喪稱父母喪稱母父母不在則稱伯父世母曾子問曰取女有吉日而女死如之何孔子曰壻齊衰而弔夫死亦如之

陳夫死女以斬衰往弔

曾子問曰三年之喪弔乎孔子曰三年之喪練不羣立不旅行君子禮以飾情三年之喪而弔哭不亦虛乎

陳練小祥也旅衆也羣立旅行言及他事則為忘哀況於弔乎

文王世子

族之相為也宜弔不弔宜免不免有司罰之至於贈賻承含皆有正焉

陳四世而總服之窮也五世親盡祖免而已六世以往弔而已矣當弔而不弔當免而不免皆為廢禮故有司者罰之所以肅禮教也賻以車馬賻以貨財含以珠玉襚以衣服四者總謂之贈隨其親疎各有正禮

公族獄成有司獻於公致刑於甸人反命於公公素

服不舉爲之變如其倫之喪無服親哭之

陳素服不舉爲之變其常禮示憫惻也如其親疎之倫而不爲乎服者以不親往故也但居外不聽樂及賻贈之類仍依親疎之等耳親哭之者爲位於異姓之廟而素服以哭之也天子諸侯絕旁親故知此言無服是不爲乎服

敬弔臨賻賻賻之道也

陳族人人有喪君必敬謹其弔臨賻賻之禮者是皆和睦友愛族人之道也

公族之罪刑於隱弗弔弗爲服哭於異姓之廟爲忝祖遠之也素服居外不聽樂私喪之也骨肉之親無絕也

陳刑已當罪而猶私喪之者以骨肉之親雖陷刑戮無斷絕之禮也

玉藻

褻之褻也見美也弔則襲不盡飾也君在則褻盡飾也

陳此言褻襲之異宜見美謂褻衣上雖加他服猶必開露以見示褻衣之美弔喪襲褻惟小斂後則然盡飾者盡其文飾之道以爲敬弔主於哀故敬不在美君在則當以盡飾爲敬也

喪服小記

諸侯弔於異國之臣則其君爲主諸侯弔必皮弁錫衰所弔雖已葬主人必免主人未喪服則君亦不錫衰

陳錫者治其布使滑易也國君自弔其臣則素弁環絰錫衰弔異國臣則皮弁錫衰也人君來弔雖

非服免之時必爲之免以尊重人君故也禮既殯而成服此言未喪服謂未成服也

少儀

適有喪者曰比童子曰聽事
陳其辭云某願比於將命者喪不主相見來欲比方於執事之人也童子未成人其辭則云某願聽事於將命者謂來聽主人以事見使令也

適公卿之喪則曰聽役於司徒

陳孟獻子之喪司徒旅歸四布則公卿之喪司徒掌其事也故云某願聽役於司徒
臣致褻於君則曰致廢衣於賈人斂者曰褻親者兄弟不以褻進

陳以衣送死者謂之褻稱廢衣者不敢必用之以斂將廢棄之也賈人識物價貴賤而主君之衣物者也斂者則直以褻言矣凡致褻若非親者則須擯者傳辭將進以爲禮若親者兄弟之類但直將進而陳之不須執以將命故云不以褻進也士喪禮大功以上同財之親褻不將命即陳於房中小功以下及同姓等皆將命

臣爲君喪納貨貝於君則曰納甸於有司賈馬入廟門賻馬與其幣大白兵車不入廟門

陳納甸入也甸田也臣受君之田邑此納者田野所出故云納甸也賈馬以送死者故可入廟門賻馬與幣所以助主人喪事之用故不入廟門大白之旗與兵車雖並爲送喪之用以其本戰伐之具故亦不可入於廟門此謂國君之喪鄰國有以此爲賻者亦或本國自有之也

賻者既致命坐委之擯者舉之主人無親受也

陳來賻者既致其主之命即跪而委置其物於地擯者乃舉而取之主人不親受異於吉事也

尊長於己踰等喪俟事不恤弔特弔

陳於尊者之喪則待主人哭之時而往不非特弔

雜記

大夫之哭大夫升經大夫與殯亦升經

陳大夫之喪既成服而大夫往弔則身著錫衰首加弁經弁經者如簪弁而素加以環絰也若與其殯事是未成服之時也首亦弁經但不錫衰耳不錫衰則皮弁服也

諸侯相褻以後路與冕服先路與喪衣不以褻

陳後路貳車也貳車在後故曰後路冕服上冕之後次冕也上公以鷩冕爲次侯伯以毳冕爲次子男以絺冕爲次先路正路也喪衣者始命爲諸侯之衣及朝覲時天子所加賜之衣也相褻不可用己之正車服者以彼不用之以爲正也

君若載而后弔之則主人東面而拜門右北面而踊出待反而后奠

陳此謂君來弔臣之喪而柩已朝廟畢載在柩車君既弔位在車之東則主人在車西東面而拜門右祖廟門之西偏也自內出則右在西孝子既拜君從位而立故於門內西偏北面而哭踊爲禮也踊畢先出門以待拜送不敢必君之久留也君命之反還喪所即設奠以告死者使知君之來弔也弔者即位於門西東面其介在其東南北面西上西